

Aalisariutini isumannaallisaaneq pillugu sulineq pillugu nalunaarut (Umiarsuarni sullivimmi avatangiisit)¹

Inatsimmik allanngorneri ilanngullugit nalunaarutiginninneq nr. 221, 11. februar 2022-imeersoq malillugu imarsiornerup isumannaatsuunissaa pillugu inatsimmi, inatsisikkut nr. 1773-ikkut, 28. december 2023-imeersukkut allanngortinneqartumi, § 3, imm. 1, nr. 6, aamma § 32, imm. 10 malillugit, aamma peqqussut pillugu nalunaarummi nr. 1674, 16. december 2015-imeersumi § 3, nr. 6, aamma § 32, imm. 2 malillugit imarsiornerup isumannaatsuunissaa pillugu inatsisip Kalaallit Nunaannut atuutilersinneqarnissaat pillugu peqqussummi, piginnaatitaanerit ilaannik Søfartsstyrelsimut inissiineq aamma maalaaruteqarsinnaaneq il.il. pillugit Kalaallit Nunaannut nalunaarummi nr. 262-imi, 23. marts 2020-imeersumi § 1, imm. 1, nr. 3, aamma piginnaatitaanerit ilaannik Søfartsstyrelsimut inissiineq aamma maalaaruteqarsinnaaneq il.il. pillugit Kalaallit Nunaannut nalunaarummi nr. 279-imi § 1, imm. 1, nr. 2 malillugit aalajangersarneqarpoq:

Kapitali 1

Atuuffissaa siunertaalu

§ 1. Aalisariutitut Danmarkimi Kalaallit Nunaannilu najugaqartunut nalunaarut atuuppoq.

Imm. 2. Inuit, umiarsuaatilimmit imaluunniit sulisitsisumit allamit (tulliuttuni umiarsuaatilimmit taaneqartumit) inuussutissarsiornermut tunngasumik umiarsuarsuarmi sulinissamut atorfinitsinneqartut, nalunaarummi ilaatinneqarput.

Imm. 3. Aalisariutitut paasineqassaaq umiarsuaq, inuussutissarsiutigalugu aalisakkanik il.il. aalisarnernut atorneqartoq, aamma naalagaaffimmut attuumassuteqarnermut allagartaa umiarsualivimmi ilisarnaatitut normulersugaasoq.

¹ Sulisut sulinerminni isumannaatsuunissaasa peqqissuunissaasalu pitsanngorsarneqarnissaannut iliuusissat aallartinneqarnissaat pillugit, Siunnersuisoqatigiit peqqussutaata 89/391/EØF-ip 12. juni 1989-imeersup ilaanik naammassinnittussanik, nalunaarut aalajangersakkanik imaqarpoq, EF-Tidende 1989, nr. L 183, qupperneq 1.

§ 2. Aalisariutini isumannaallisaaneq pillugu sulinermi, pitsaasumik, isumannaatsumik aamma timikkut tarnikkullu peqqissumik sullivimmi avatangiiseqarnissaq siunertarineqarpoq.

Kapitali 2

Aalajangersakkat ataatsimoorussat

Umiarsuaatillit umiarsuullu naalagaata pisussaaffii il.il.

§ 3. Aalisariutini isumannaatsuunissaq peqqinnissarluk pillugit suliaqarneq umiarsuaatillip, umiarsuup naalagaata, aqumiut, ataatsimoorussamik aalisartut akuusut aamma allat, umiarsuarmi suliamik suliaqartut, akornanni suliarineqassaaq.

Imm. 2. Umiarsuarmi sulinerup aaqqissuunneqarnerata, taamaalilluni isumannaatsuunissamut-peqqissutsimullu tunngasumik tamakkiisumik illersorneqarsinnaasumik pinissaa, umiarsuaatillip umiarsuullu naalagaata pingaarnertut akisussaaffigivaat.

Imm. 3. Umiarsuarmi sulinerup isumaannaasuunissamut peqqissutsimullu tunngasumik tamakkiisumik illersorneqarsinnaasumik pinissaa, umiarsuarmiittut tamarmik immikkut ataatsimoorlutillu akisussaaffigivaat.

Imm. 4. Isumannaallisaaneq pillugu aaqqissuussinermi ilaasortat umiarsuarmi ajornartorsiutaasinnaasut isumannaallisaanermut-peqqissutsimullu tunngassuteqartut aaqqinneqarnissaat suliarissavaat.

§ 4. Nalunaarummut massumunnga naapertuuttumik, isumannaallisaaneq pillugu aaqqissuussinerup ingerlalluurtup aamma umiarsuarmi sulinerup nalaani isumannaatsuunissap peqqissuunissallu siuarsarneqarnissaanut ilapittuutaasup, pilersinneqarnissaa, ineriartortinneqarnissaa aamma aserfallatsaalineqarnissaa, umiarsuaatillip umiarsuullu naalagaata akisussaaffigivaat.

§ 5. Isumannaallisaaneq pillugu aaqqissuussinermi ilaasortat isumannaallisaaneq pillugu sullissinerminni pisussaaffimminnik isumaginninnissaminnut pisariaqartinneqartumik piffissaqartinneqarnissaat, umiarsuaatillip isumagissavaa.

Imm. 2. Isumannaallisaaneq pillugu aaqqissuussinermi ilaasortat isumannaatsuunissamut-peqqissutsimullu tunngassuteqartunik apeqqutit pillugit pisariaqartinneqartumik ilisimasaqarnissaat, imaluunniit ilinniagaqarnissaat, umiarsuaatillip periarfissiissutigissavaa.

Imm. 3. Isumannaallisaaneq pillugu aaqqissuussinermi ilaasortat suliaasaannut aningaasartuutit aamma isertitassaraluanik annaasat taarserneqarnissaat, matumani isumannaallisaaneq- aamma sullivimmi isumannaallisaanikkut pissutsit pillugit pisariaqartinneqartumik pikkorissarnernut il.il. atatillugu aningasartuutit isertitassaraluillu annaaneqartut ilanngullugit, umiarsuaatillip aningaasartuutigissavai.

Imm. 4. Isumannaallisaaneq pillugu aaqqissuussinermi ilaasortat suliaasaqarfimmut pineqartumut, nalliuteqqittartumik nakkutilliinerni imaritinneqartut saniatigut, suliaasaqarfimmut aalisariutip najugaqarfigisaanut piumasaqaatinik, Søfartsstyrelsen allakkatigut tunniussaanik, ilisimasaqarnissaat, umiarsuaatillip attuumassuteqartup pisussaaffigaa.

§ 6. Pissutsit § 5, imm. 3-imi taaneqartut pillugit isumaqatigiinngissutit, matumani malittarisassat suut atuunnersut, aamma malittarisassat unioqqutinneqarnerat imaluunniit

isumasiorneqarnerat pillugit apeqqutit, kiisalu qinersinermut qinigassanngortissinnaanermullu najoqqutassat, matumani malittarisassat suut atuunnersut pillugit apeqqutit, aamma malittarisassat unioqqutinneqarnerat imaluunniit isumasiorneqarnerat ilanngullugit, Sulisartoqarneq pillugu eqqartuussivik aamma suliamut tunngatillugu isumaqatigiissitsiniarnikkut eqqartuussiviit pillugit inatsimmi malittarisassat malillugit suliamut tunngatillugu inatsiseqartitsineq malillugu aalajangiiffigineqassapput.

§ 7. Suliamut tunngasumik suliasaqarfiup iluani pineqartumi imaluunniit assigisaanni sinniisunut atugassarititaasut assigalugit, isumannaallisaaneq pillugu aaqqissuussinermi ilaasortat soraarsinneqarnermut, soraarsitaanermut imaluunniit allatut atugarisaminnik ajornerulersitsivigineqarnermut illersugaapput.

Ilinniagaqarneq, »§ 8 malillugu pikkorissarneq«

§ 8. Isumannaallisaaneq pillugu aaqqissuussinermi ilaasortat tamarmik, kapitalini 3-mi, 4-mi aamma 5-imi allaaserineqartut, pikkorissartitsisumit, imarsiornermi pikkorissarsitsinerik tuniniaasut, pikkorissaanerit aamma misilitsinnerit akuersissutigineqartarnerat aamma pitsaassusaasa qularnaarneqarnissaat pillugit nalunaarut malillugu Søfartsstyrelsimit akuerineqartumit, aalisariutinut sullivimmi isumannaallisaanikkut pissutsit pillugit pikkorissarnermik naammassinnissimassapput.

Imm. 2. Isumannaallisaaneq pillugu aaqqissuussinermi ilaasortat, kapitalini 3-mi, 4-mi aamma 5-imi allaaserineqartut, tamatuma saniatigut ukiut 5-kkaarlugit, aalisariutinut sullivimmi avatangiisini pissutsit pillugit ilinniarnermi, Søfartsstyrelsimit akuerineqartumi, pikkorissarnermik nutartereqqiffiusumik naammassinnissimassapput.

Imm. 3. Inuit, imarsiornermi ilinniakkat pillugit inatsit malillugu, imarsiorneq pillugu ilinniarnermut atatillugu, aalisariutini isumannaallisaaneq pillugu ataatsimiititalianut aamma sulisut allat pulaartullu isumannaatsuunissaat pillugit sulisunut suliaqartunut, sullivinni avatangiisini pissutsit pillugit pikkorissartitsinerit assigisaannik, sullivimmi avatangiisini pissutsit pillugit ilinniakkamik (§ 8 malillugu pikkorissarnermik) naammassinnissimasut, imm. 1-imi piumasaqaammik naammassinnissimasutut isigineqarput.

§ 9. § 8, imm. 1 malillugu, sulisut allat pulaartullu isumannaatsuunissaat pillugit isumannaallisaaneq pillugu ataatsimiititaliami ilaasortaasut, sullivimmi isumannaallisaanikkut pissutsit pillugit ilinniakkamik naammassinnissimannigitsut, qinerneqarnerup imaluunniit qinerneqarnerup kingunitsiannua, ilinniakkamik neqerooruteqartumut, Søfartsstyrelsimit akuerineqartumut, ilinniarnissamut nalunaarutigineqassapput. Umiarsuaatillip imaluunniit umiarsuup naalagaata nalunaarutiginninneq isumagissavaat.

§ 10. Isumannaallisaanermut sinniisup- imaluunniit aqutsisut sinniisaata pineqartup qinerneqarnerata imaluunniit qinerneqarnerata kingorna qaammatit 6 iluanni, ilinniarneq naammassineqarsimassaaq.

Kapitali 3

Aalisariutinut, umiarsuup naalagaa ilanngullugu, arfineq marlunnik imaluunniit ikinnerusunik sulisoqartunut isumannaallisaaneq pillugu aaqqissuussineq

§ 11. Aalisarnermik inuutissarsiuteqarnermi suleqatigiiffiit akornanni isumaqatigiinniarnep kingorna suliaasaqarfinni naammattumik amerlassusilinni ataatsimoorussamik isumannaallisaaneq pillugu ataatsimiititaliamik pilersitsisoqassaaq. Isumannaallisaaneq pillugu ataatsimiititaliat amerlassusaat pisariaqartitsineq malillugu nutarterneqartassapput.

Imm. 2. Isumannaallisaaneq pillugu ataatsimiititaliat tamarmik immikkut ataatsimoorussamik aalisartunit akuusunit umiarsuaatilinnillu assigiimmik amerlassusilinnik inuttaqassapput. Taama tulleriillutik ataatsimoorussamik aalisartut umiarsuaatillillu amerlassusaat ikinnerpaamik marluussapput amerlanerpaamillu arfiniliussallutik. Sinniisut amerlassusaat aalisarnermik inuutissarsiuteqarnermi suleqatigiiffiit akornanni isumaqatigiinniarnep kingorna aalajangerneqassapput.

§ 12. Isumannaallisaaneq pillugu ataatsimiititaliap siulittaasuni nammineerluni qinissavaa. Ataatsimoorussamik aalisartut- aamma aqutsisut sinniisuisa akornanni siulittaassuuffik ukiut allortarlugit nikisinneqartassaaq.

Imm. 2. Ataatsimoorussamik aalisartunut sullivimmi isumannaallisaanikkut pissutsit pillugit siunnersorti ataaseq aamma umiarsuaatilinnut sullivimmi isumannaallisaanikkut pissutsit pillugit siunnersorti ataaseq, isumannaallisaaneq pillugu ataatsimiititaliamut attaveqartinneqarsinnaapput.

Imm. 3. Ataatsimoorussamik aalisartut sumiiffimmi pineqartumi isumannaallisaaneq pillugu ataatsimiititalianut ilaasortassanik qinersissapput. Qinigaaneq ukiunut 2-nnut, imaluunniit ataatsimoorussamik aalisartup qinigaasup inuussutissarsiummiikkunnaarnissaata tungaanut, atuutissaaq. Qinigaaqqinneq pisinnaavoq.

Imm. 4. Umiarsuaateqarfiit attorneqartut sumiiffimmut pineqartumut isumannaallisaaneq pillugu ataatsimiititaliamut ilaasortassanik qinersissapput. Qinigaaneq ukiunut marlunnut, imaluunniit sinniisuutitap qinigaasup inuussutissarsiummiikkunnaarnissaata tungaanut, atuutissaaq. Qinigaaqqinneq pisinnaavoq.

Imm. 5. Ingerlatseriaaseq immikkut ittoq aalisarnermik inuutissarsiuteqarnermi suleqatigiiffiit akornanni isumaqatigiissutigineqartoq malillugu qinersineq pissaaq.

Imm. 6. Isumannaallisaaneq pillugu ataatsimiititaliani ilaasortat pillugit nalunaarsuutit tamanut saqqummiunneqassapput aserfallatsaaliorneqassallutillu, taamaalilluni nalunaarsuut ilaasortat qinerneqarnerisa kingorna piaarnerpaamik nutarterneqarsimassalluni.

§ 13. Aalisartunut timikkut tarnikkullu isumannaallisaaneq- aamma peqqinnissaq pillugit suliat isumannaallisaaneq pillugu ataatsimiititaliap pilersaarusiussavai, aqussavai aamma ataqatigiissaassavai. Aalisartut suliffimminni isumannaallisaanikkut pissutsini atukkaminni ajornartorsiutaat ataatsimiititaliap nalunaarsussavai aamma suliffimmi isumannaallisaanikkut pissutsit pillugit apeqqutit aaqqinneqarneranni siunnersuissallutik.

Imm. 2. Ajunaarnernut, toqunartortortitaanernut aamma inuussutissarsiummit pissuteqartumik napparsimalernernut pissutaasut kiisalu taakkununga aallartisarnerit, isumannaallisaaneq pillugu ataatsimiititaliap misissorneqarnissaat isumagissavaa, aamma iliuusissat, taama pisoqaaqqinninnissaanik pitsaaliuisut, naammassineqarnissaat isumagissallugu.

Imm. 3. Aalisartut illersorniarlugit isumannaallisaanermut peqqissutsimullu tunngassuteqartut aalajangersakkat aalajangersarneqarsimasut pillugit, isumannaallisaaneq pillugu ataatsimiititaliap paasisimasaqassaaq. Pisariaqartinneqartumik ilinniarinneqarnissamut ilitersuunneqarnissamullu tunngaviit ataatsimiititaliap inississavai aamma isumannaatsuunissaq pillugu aalajangersakkat eqqortinneqartuarnissaat pillugit nakkutilliuartoqarnissaa isumagissallugu.

§ 14. Isumannaallisaaneq pillugu ataatsimiititaliaq aalajangersimasumik pisartumik nalinginnaasumik ataatsimiittassaaq. Tamatuma saniatigut ilungersunartumik ajutoortoqarsimatillugu, ilungersunartumik toqunartortoqarsimatillugu imaluunniit peqqinnissamut ajoqusiinerit ilungersunartut allat pisimatillugit, kiisalu allakkut tamanna pisariaqartinneqaraangat, ataatsimiititaliaq ataatsimiittassaaq. Siulittaasup tamanna pisariaqartinneqartoq nalilerpagu, imaluunniit minnerpaamik ataatsimiititaliami ilaasortat marluk tamanna kissaatigippassuk, immikkut ittumik ataatsimiittoqassaaq.

Imm. 2. Isumannaatsuunissaq pillugu ataatsimiititaliami nalinginnaasumik ataatsimiinnissanut sioqqutsilluni aggersaasoqartassaaq.

Imm. 3. Isumannaatsuunissaq pillugu ataatsimiititaliami ataatsimiinnernit imaqarniliortoqartassaaq. Isumannaatsuunissaq pillugu ataatsimiititaliami ataatsimiinnernit imaqarniliornerit sumiiffimmi suleqatigiiffinnut attuumassuteqartunut tamanut nassiunneqassapput.

Imm. 4. Ataatsimiitsitaliami sulineq pillugu ataatsimut nalunaarsuutinik ukiumut ataasiarluni ataatsimiitsitaliaq suliaqartassaaq.

Kapitali 4

Aalisariutinut, umiarsuup naalagaa ilanngullugu, arfineq pingasuniit 15-it tungaannut sulisoqartunut isumannaallisaaneq pillugu aaqqissuussineq

§ 15. §§ 16-imiit 18 ilanngullugu aalajangersakkanut naapertuuttumik, aalisarnermik inuutissarsiuteqarnermi suleqatigiiffiit akornanni isumaqatigiinniarnert kingorna, aalisariutinut, umiarsuup naalagaa ilanngullugu, arfineq pingasuniit 15-it tungaannut sulisoqartunut, isumannaallisaaneq pillugu aaqqissuussinermik pilersitsisoqarsinnaavoq.

Imm. 2. Imm. 1 malillugu isumannaallisaaneq pillugu aaqqissuussinermik pilersitsisoqanngippat, aalisariutini, taakkunani umiarsuup naalagaa ilanngullugu inuit 16-it imaluunniit amerlanerusut sulillutik, isumannaallisaaneq pillugu aaqqissuussineq pillugu aalajangersakkat atuutissapput.

§ 16. Umiarsuarmi sulisut aqutsisuisa akornanni aqutsisut sinniisaat umiarsuup naalagaata qinissavaa, aamma sulisuinnaat akunnerminni isumannaallisaanermut sinniisuutitaq qinissavaat.

Imm. 2. Aqutsisut sinniisuut qinerneqartoq aamma isumannaallisaanermut sinniisuutitaq qinerneqartoq ataatsimoorlutik tassaapput umiarsuup isumannaallisaanermut suleqatigiissitai.

Imm. 3. Isumannaallisaanermut sinniisuutitaanertut suliassaqtitaaneq, isumannaallisaanermut sinniisuutitap umiarsuarmi suliaminik imaluunniit sullissinerminik atuuffiata atorunnaarnissaata tungaannut atuutissaaq, taamaattoq sivisunerpaamik ukiuni marlunni. Qineqqinneqarneq pisinnaavoq.

Imm. 4. Qinerneqarnerup inernera pillugu, qinersinerup kinguinngua umiarsuup naalagaa nalunaarfigineqassaaq.

§ 17. Umiarsuarmi isumannaallisaaneq- aamma peqqinnissaq pillugit apeqqutit pillugit suleqatigiilluartoqarnissanut isumannaallisaanermut suleqatigiissitat sulissapput.

Imm. 2. Sulinermi pissutsit aamma sulinerup isumannaatsuunissamut peqqissutsimullu tunngasumik tamakkiisumik illersorneqarsinnaasumik aaqqissuunneqarnissaat suliarineqarnissaallu, isumannaallisaanermut suleqatigiissitat nakkutigissavaat, matumani

sunniuteqarluartumik ilinniartitsinerup ilitersuinerullu tunniunneqarneri, aamma sakkussat atortorissaarutillu tekniskiusut allat il.il. isumannaallisaanermut- peqqinnissamullu tamakkiisumik illersorneqarsinnaasumik aqqissuunneqarnerat atorneqarnerallu ilanngullugit.

Imm. 3. Isumannaallisaanermut- aamma peqqinnissamut pissutsit pillugit sulliviup- aamma aarlerinassutsip naliliiffigineqarnerani isumannaallisaanermut suleqatigiissitat peqataassapput.

Imm. 4. Ataatsimoorussamik isumannaallisaaneq pillugu ataatsimiititaliamut § 18-imi taaneqartumut, isumannaallisaanermut suleqatigiissitat aamma atassutitut sulissapput, matumani suliffimmi isumannaallisaanikkut pissutsit pillugit ajornartorsiutit pillugit isumannaallisaaneq pillugu ataatsimut ataatsimiititaliap ilisimatinneqarnissaa aamma taamaattoqassappat pitsaannorsaatissatut siunnersuutit ataatsimiititaliamut saqqummiunneqarnissaat ilanngullugit.

Imm. 5. Suliffimmi isumannaallisaanikkut pissutsini aarlerinartorsiortitsisinnasut pitsaalineqarnissaat isumannaallisaanermut suleqatigiissitat nakkutigissavaat, matumani aarlerinaat erngerluni pitsaaliorneqarsinnaanngippat, pissutsit umiarsuup naalagaanut nalunaarutigineqarnissaat ilanngullugu. Umiarsuup naalagaata nalunaarfiginissaanut piffissaqanngippat, aamma inuttat isumannaatsuunissaanut peqqissusaannullu nalliulluinnalersumik annertuumik nammineerlutik pinngitsoortissinnaanngisaminnik navianartorsiortitsisoqartoq, isumannaallisaanermut suleqatigiissitat nalilerpassuk, navianartorsiortinerup pitsaalineqarnissaanut pisariaqartinneqartumik annertussusilimmik sulineq imaluunniit sulineramik ingerlatsineq suleqatigiissitat unitsissinnaavaat. Unitsitsineq pillugu isumannaallisaanermut suleqatigiissitat erngerlutik umiarsuup naalagaanut nalunaaruteqassapput, unitsitsinerlu sooq pisariaqarsimanersoq pillugu nassuiaammik tunniussillutik.

Imm. 6. Umiarsuarmi isumannaallisaaneq pillugu ataatsimiititaliamut, § 18-imi taaneqartumut, suliaq pillugu isumannaallisaanermut suleqatigiissitat ilisimatitsissapput.

§ 18. Aalisariutinut § 15, imm. 1-imi ilaatinneqartunut ataatsimoorussamik isumannaallisaaneq pillugu ataatsimiititaliamik pilersitsisoqassaaq.

Imm. 2. Ataatsimoorussamik isumannaallisaaneq pillugu ataatsimiititaliaq isumannaallisaanermut suleqatigiissitanit aamma umiarsuaatilinnit ilaasortanik assigiimmik amerlassusilinnik inuttaqartinneqassaaq.

Imm. 3. Umiarsuarmi isumannaallisaanermut suleqatigiissitani ilaasortani minnerpaamik ataatsip, ataatsimoorussamik isumannaallisaaneq pillugu ataatsimiititaliami umiarsuaq pineqartoq sinniisuuffigissavaa.

Imm. 4. §§ 11-imiit 14 ilanngullugu malillugit, isumannaallisaaneq pillugu ataatsimiititaliat pillugit aalajangersakkat atuuttut aammattaaq ataatsimoorussamik isumannaallisaaneq pillugu ataatsimiititaliat malissavaat.

Kapitali 5

Aalisariutinut, umiarsuup naalagaa ilanngullugu, arfersanilinnik amerlanerusunilluunniit sulisoqartunut isumannaallisaaneq pillugu aqqissuussineq

§ 19. Umiarsuarmi ingerlatsivinnit, inunnit amerlanerpaanit suliffigineqartunit, sulisuinnaat akunnerminni isumannaallisaanermut sinniisuutitanik marlunnik qinersissapput, aamma qinersinerup kinguninngua qinersinerup inernera pillugu umiarsuup naalagaanut nalunaaruteqassallutik.

Imm. 2. § 1, imm. 2-mi sulisitatut taaneqartut, aqumiunngitsut imaluunniit assigisaanik allatut sulisunut aqutsisuunngitsut tamarmik, sulisuinnartut paasineqassapput.

Imm. 3. Isumannaallisaanermut sinniisuutitaanertut suliassaqaqtitaaneq, isumannaallisaanermut sinniisuutitap umiarsuarmi suliaminik imaluunniit sullissinerminik atuuffiata atorunnaarnissaata tungaanut atuutissaaq, taamaattoq sivisunerpaamik ukiuni marlunni. Qineqqinneqarneq pisinnaavoq.

§ 20. Umiarsuarmi ingerlatsivinnit, inunnit amerlanerpaanit suliffigineqartunit, umiarsuarmi sulisunut aqutsisut akornanni aqutsisut sinniisaannik marlunnik umiarsuup naalagaa toqqaassaaq.

Imm. 2. Aqutsisut sinniisaat isumannaallisaanermut sinniisuutitaasut peqatigalugit umiarsuup isumannaallisaanermut suleqatigiissitarai.

§ 21. Isumannaallisaanermut suleqatigiissitat umiarsuup naalagaa peqatigalugu isumannaallisaaneq pillugu ataatsimiititaliamik pilersitsissapput. Ataatsimiititaliamut umiarsuup naalagaa siulittaasuvoq.

Imm. 2. Tamanna isumaqatigiissutigineqarpat, isumannaallisaaneq pillugu ataatsimiititaliaq inunnik allanik sinniisuutitaqarsinnaavoq.

§ 22. Isumannaallisaanermut suleqatigiissitat tulliuttut nakkutigissavaat,

- 1) sulinermi pissutsit aamma sulinerup isumannaatsuunissamut- peqqissutsimullu tunngasumik tamakkiisumik illersorneqarsinnaasumik aaqqissuunneqarnera aamma suliarineqarnera,
- 2) atortussiat atortullu, sulinermi ingerlatsinerit periaatsillu, sunniuteqarluartumik sulisunik ajunaartitsinnginnissamut napparsimalersitsinnginnissamullu qulakkeerinnittut atorlugit taamaallaat atorneqarnissaat,
- 3) ilinniartitsinerit ilitersuinerillu sunniuteqarluartut tunniunneqarnissaat, aamma
- 4) sakkut teknikkikkullu atortorissaarutit allat il.il. isumannaatsuunissamut peqqissutsimullu tunngasumik tamakkiisumik illersorneqarsinnaasumik aaqqissuunneqarsimanissaat atorneqarnissaallu.

Imm. 2. Ataatsiakkaat qanoq iliuuseqarneri, namminneq allallu isumannaatsuunissaannut peqqissuunissaannullu siuarsaataasut, isumannaallisaanermut suleqatigiissitat sunnissavaat, matumani umiarsuarmi isumannaatsuunissap peqqissuunissallu siuarsarneqarnissaanut aalajangersakkat aalajangersarneqarsimasut pillugit ilisimatitsinerit ilanngullugit.

Imm. 3. Suliassaqaqfimmi iluani isumannaallisaanermut- peqqissuunissamullu suliaqarnerup pilersaarusionerqarnerani, isumannaallisaanermut suleqatigiissitat peqataassapput, matumani isumannaallisaanermut- peqqissutsimullu pissutsini aarlerinarsinnaasut naliliiffigineqarnerat ilanngullugu.

Imm. 4. Isumannaallisaanermut suleqatigiissitat tulliuttut suliarissavaat:

- 1) sulisitat isumannaallisaanerlu pillugu ataatsimiititaliap akornanni atassutitut atuutissalluni,
- 2) suliffimmi isumannaallisaanikkut pissutsit pillugit ajornartorsiutit pillugit ataatsimiititaliaq nalunaarfigissallugu aamma
- 3) pitsanngorsaataasinnaasut pillugit siunnersuutissaqarunik siunnersuutininik ataatsimiititaliamut saqqummiussissallutik.

Imm. 5. Suliffimmi isumannaallisaanikkut pissutsini navianartorsiortitsisinnaasut pitsaaliorneqarneri, isumannaallisaanermut suleqatigiissitat nakkutigissavaat. Aarlerinaat erngerluni pitsaaliorneqarsinnaanngippat, pissutsit umiarsuup naalagaanut nalunaarutigineqarnissaat, isumannaallisaanermut suleqatigiissitat isumagissavaat.

§ 23. Umiarsuup naalagaata nalunaarfiginissaanut piffissaqanngippat, aamma inuttat isumannaatsuunissaanut peqqissusaannullu nalliulluinnalersumik annertuumik nammineerlutik pinngitsoortissinnaanngisaminnik navianartorsiortitsisoqartoq, isumannaallisaanermut suleqatigiissitat nalilerpassuk, navianartorsiorderup pitsaalineqarnissaanut pisariaqartinneqartumik annertussusilimmik sulineq imaluunniit sulineramik ingerlatsineq suleqatigiissitat unitsissinnaavaat. Unitsitsineq pillugu isumannaallisaanermut suleqatigiissitat erngerlutik umiarsuup naalagaanut nalunaaruteqassapput, unitsitsinerlu sooq pisariaqarsimanersoq pillugu nassuiaammik tunniussillutik.

§ 24. Isumannaallisaaneq- peqqissuserlu pillugit suliaqarnerit aamma iliuutsit umiarsuarmi sulisitanut isumannaallisaanermut peqqissusermullu pingaaruteqarsinnaasut, isumannaallisaaneq pillugu ataatsimiititaliap pilersarusiussavai, aqussavai ataqatigiissaassallugillu. Suliffimmi isumannaallisaanikkut pissutsini ajornartorsiutaasut ataatsimiititaliap nalunaarsussavai aamma suliffimmi isumannaallisaanikkut pissutsit pillugit apeqqutit aaqqinneqarneranni siunnersuissallutik.

Imm. 2. Isumannaallisaanermut- peqqissutsimullu tunngasumik apeqqutit aaqqinneqarneranni umiarsuarmut ikiuinissaq pillugu saaffiginnittoqassappat saaffiginninnissaq sioqqullugu isumannaallisaaneq pillugu ataatsimiititaliap tusarniaavigineqassaaq.

Imm. 3. Ajunaarnernut, toqunartortortitaanernut aamma taakkununga aallartisarnerit, isumannaallisaaneq pillugu ataatsimiititaliap misissorneqarnissaat isumagissavaa, aamma iliuusissat, taama pisoqaqqinnginnissaanik pitsaaliuisut, naammassineqarnissaat isumagissallugu.

Imm. 4. Umiarsuarmi sulinermi ajutoornerit pillugit allattuiffiit aamma nalunaarusiani pisimasut qanoq ingerlasimanerat pillugu allaaserinninnerit, suliarineqartussat, pillugit isumannaallisaaneq pillugu ataatsimiititaliap aamma isumannaallisaanermut suleqatigiissitaq pineqartoq takunnissinnaatitaassaaq.

Imm. 5. Isumannaallisaaneq pillugu ataatsimiititaliap tulliuttut suliarissavai:

- 1) umiarsuarmi sulisitat illersorniarlugit, isumannaallisaanermut peqqinnissamullu aalajangersakkat aalajangersarneqartut pillugit ilisimasaqarluarnissaq,
- 2) umiarsuarmi sulinermi pissutsinut naleqqussakkamik naammattumik aamma pisariaqartinneqartumik ilinniartinneqarnissamut ilitsersorneqarnissamullu tunngaviit inissinneqarneranni peqataanissaq aamma
- 3) isumannaallisaaneq pillugu malittarisassat eqqortinneqarnerisa nakkutigineqartuarnissaat isumagissallugu.

Imm. 6. Isumannaatsuunissamut peqqissuunissamullu suliaqarnerup sulisitsisunut allanut, umiarsuarmi suliaqartunut, ataqatigiissaarneqarnissaata isumagineqarnissaa, isumannaallisaaneq pillugu ataatsimiititaliap peqataaffigissavaa.

Imm. 7. Isumannaallisaaneq pillugu aaqqissuussinermi ilaasortaasut suliarit ima suliarissavaat, umiarsuarmi nammineq imaluunniit allat nalinginnaasumik sulinerannik annikinnerpaamik unitsitsisumik kinguneqassalluni.

§ 25. Isumannaallisaaneq pillugu ataatsimiititaliap aalajangersimasumik pisartunik nalinginnaasunik ataatsimiittassaaq. Aammattaaq ilungersunartumik ajutoortoqarsimatillugu, ilungersunartumik toqunartortoqarsimatillugu imaluunniit peqqinnissamut ajoqusiinerit ilungersunartut allat, ajutoornernik imaluunniit peqqissutsimut ajoqusiinernik allanik

kinguneqarsinnaasut pisimatillugit, isumannaallisaaneq pillugu ataatsimiititaliaq ataatsimiittassaaq.

Imm. 2. Ataatsimiinnernut siulittaasoq aggersaassaaq. Ataatsimiititaliami ilaasortat minnerpaamik marluk tamanna kissaatigippassuk, siulittaasoq ataatsimiigiaqqusissaaq.

Imm. 3. Isumannaallisaaneq pillugu ataatsimiititaliami ataatsimiinnerni umiarsuup nakkutilliineq pillugu atuagaataa ilaasortanit atorneqarsinnaassaaq atuarneqarsinnaassallunilu.

Imm. 4. Ataatsimiinnernit imaqarniliortoqassaaq. Imaqarniliaq ataatsimiititaliami ilaasortanut tunniunneqassaaq, umiarsuarmi sulisitanut tikinneqarsinnaasunngortinneqassalluni kiisalu umiarsuaatilimmut nassiunneqassalluni.

Imm. 5. Isumannaallisaaneq pillugu ataatsimiititaliap ataatsimiinnerani, ilaasortaviit saniatigut, inuit Søfartsstyrelsiminngaanneersut peqataasinnapput.

Imm. 6. Tamanna isumaqatigiissutigineqarpat, isumannaallisaaneq pillugu ataatsimiititaliap inuit allat ataatsimiititaliap ataatsimiinneranni peqataatissinnaavai.

Kapitali 6

Pillaatissiineq pillugu aalajangersakkat

§ 26. Unioqqutitsinermi akiliisitsissut imaluunniit ukioq 1 tikillugu parnaarussaaneq pillaatissiissutigineqassaaq.

Imm. 2. Tulliuttut pisimappata, pillaatissiineq ukiut 2 tikillugit parnaarussaannermut qaffanneqarsinnaavoq

1) unioqqutitsinermi inuunermut imaluunniit peqqissutsimut ajoqusiisoqarsimappat imaluunniit taakkununga navianartorsiortitsisoqarsimappat,

2) pissutsinut taakkununga imaluunniit assigisaannut siusinnerusukkut inerteqquteqartoqarsimappat imaluunniit naalakkiuteqartoqarsimappat imaluunniit

3) unioqqutitsinermi pineqartumut namminermut imaluunniit allanut aningaasatigut iluanaarummik angusisoqarsimappat imaluunniit aningaasatigut iluanaaruteqarnissamik siunertaqartoqarsimappat.

Imm. 3. Iluanaarummik, unioqqutitsinermi anguneqarsimasumik, arsaarinninneq pinngippat, akiliisitsissutit uuttortarneqarnerani, matumi ilassutitut akiliisitsineq ilanngullugu, aningaasatigut iluanaarutit anguneqarsimasup imaluunniit siunertarineqarsimasup annertussusaa eqqarsaatigineqassaaq.

Imm. 4. Ingerlatseqatigiiffiit il.il. (inatsisitigut pinnaatitaasut pisussaataitaasullu) pillaasarnermik inatsimmi kapitalit 5.-maanni malittarisassat malillugit pillaatissinneqarnissamik akisussaataitaasinnapput.

Imm. 5. Inatsisitigut pinnaatitaasoq pisussaataitaasorlu, suliffimmi isumannaallisaanikkut pissutsit pitsaasut isumannaatsullu qulakkeerneqarnissaannut pisariaqartinneqartumik qanoq iliuuseqaatinik tamanik iliuuseqarsimanerminik uppernarsaasoq, taamaattoq pisuni, taakkunani sulisitaq inuttut illersuutit, milluaanissamut iliuuseqarnerit, illersornissamut atortut, inummut pineqartumut illersuinissamik taamaallaat atorneqartussat, pillugit malittarisassani aalajangersakkanik unioqqutitsinerani, pillarneqarsinnaanngilaq.

§ 27. Imarsiornerup isumannaatsuunissaa pillugu inatsisip atuutilersinneqarnera pillugu peqqussummi pissutsit ilaatinneqarpat, Kalaallit Nunaanni pinerluttulerinermi inatsit malillugu pineqaatissiinerit aalajangersarneqarsinnaapput.

Imm. 2. Pissutsit § 26, imm. 2-imi taaneqartut, pissutsitut sukannernerulersitsisutut isigineqassapput.

Imm. 3. Kalaallit Nunaanni pinerluttulerinermi inatsimmi kapitali 37 malillugu iluanaarutit, unioqqutitsinermi anguneqartut, arsaarinnissutigineqarnerat pinngippat, akiliisitsissutip uuttortarneqarnerani, matumi ilassutitut akiliisitsineq ilanngullugu, aningaasatigut iluanaarutip anguneqarsimasup imaluunniit siunertarineqarsimasup annertussusaa immikkut ittumik eqqarsaatigineqassaaq.

Imm. 4. Unioqqutitsineq ingerlatseqatigiiffimmit il.il. (inatsisitigut pisinnaatitaasumit pisussaataasumillu) unioqqutitsissutigineqarpat, inatsisitigut pisinnaatitaasumut pisussaataasumullu nalinginnaasumik akiliisitsissutip akilernerneqarnissaanut akisussaaaffiliinissaq naalakkiuteqartoqarsinnaavoq. Unioqqutitsineq naalagaaffimmit, Kalaallit Nunaanni Namminersorlutik Oqartussanit, kommunimit, imaluunniit nunaqarfimmi aqutsisunit unioqqutitsissutigineqarpat, pisortani oqartussaasutut nalinginnaasumik akiliisitsissummik akiliisussatut taakku akisussaatinneqarsinnaapput.

Imm. 5. Inuk Kalaallit Nunaanni najugaqanngippat, imaluunniit inuup Kalaallit Nunaanni inuiaqatigiinnut allakkut atassuteqarnera pituttorsimanngitsutut pissuseqarpat, pineqaatissiinissat atornerneqarnissaannut piumasaqaatit pigineqaratik, Kalaallit Nunaanni pinerluttulerinermi inatsimmi § 7 malillugu suliaq Danmarkimi saqqummiunneqarsinnaavoq imaluunniit malersorneqartussatut innersuunneqarsinnaavoq.

Kapitali 7

Atuutilerfissaa il.il.

§ 29. Nalunaarut ulloq 1. januar 2026 atuutilissaaq.

§ 30. Umiarsuarni aalisariutini isumannaallisaalluni sulineq pillugu nalunaarut nr. 845, 25. juni 2018-imeersoq (Umiarsuarni sullivimmi avatangiisit) atorunnaarsinneqassaaq.